



PARLAMENTO DI KÒRSOU

Parliament of Curaçao • Parlamento de Curazao • Staten van Curaçao



Willemstad, 3 di mei 2013

Na su ekselensianan: Minister di Finansa sr. J. Jardim
Minister di Desaroyo Ekonómiko, sr. S. Martina
Minister di Tráfiko i Telekomunikashon Sr. E. Balborda
Minister di Hustisia sr. N. Navarro.

Sres.,

Basá riba desaroyonan rondó di United Telecommunication Services (UTS) i konforme artíkulo 96 di Reglamentu di Órden, mi ta dirigí e siguiente preguntanan na Boso.

Ministernan ta na altura ku:

1. United Telecommunications Services, siguiementemente yamá UTS, tin pèrmit pa bende loteria, i/òf di number, manera ta stipulá den e "loterij verordening 1909"?
2. UTS ta ofresé pa kumpra number, usando su sistema di data, via SMS?
3. UTS ta keda propagá públikamente e kompania Robbie's Lottery, komo esun ku ta fasilitá i propulsá e forma di benta aki?
4. UTS ta kombertí saldo di krédito di yamada di telefonnan GSM den plaka kèsh, pa kumpra number lokal i internashonalmente?
5. UTS ta pone su sistema disponibel pa kumpra loteria ilegal riba teritorio nashonal, prosedente di St. Maarten, reportadamente Smartplay i Daily?
6. Tur bendedó i rebendedó di loteria ta suheto na kondishonnan stipulá den e "loterij verordening 1909" (P.B. 1965 nr.85), manera adaptá?
7. UTS ta kobra "omzetbelasting" riba benta di number via SMS?

8. UTS ta hasi traspaso di "omzetbelasting" riba benta na outoridatnan kompetente?
9. Stichting Belasting Accountants Bureau por duna un bista kuantu impuesto UTS i Robbie's Lottery ta paga riba benta di loteria via SMS?
10. Menornan di edat tambe por partisipá na e loterianan via SMS aki?
11. UTS i Robbie's Lottery ta traspasá òf paga:
 - a) vergunningsrechten FNWK (fundashon wega di number Kòrsou)
 - b) vergunningsrechten extra loterij
 - c) winstbelasting
 - d) kontribushon "waarborgfonds"
12. E siguiente personanan hurídiko ta violando lei i reglamentunan válido na Kòrsou, conforme e "loterij verordening 1909", debí ku nan ta usa òf laga usa e ret di UTS ademas e ret di SMS di UTS pa bende loteria sin e pèrmitnan nesesario?
13. Ku e siguiente personanan hurídiko ta metí den e aktividatnan i maniobranan menshoná den punto 12, den e kaso aki?
 - Smartplay N.V.
 - UTS N.V. / Antelecom N.V.
 - Radcom Corporation N.V.
 - Robertico A. Dos Santos personalmente òf aktuando Bou di Robbie's Lottery Curaçao.
14. E plakanan generá ta sirkulá lokalmente òf ta bai den eksterior?
15. E plakanan generá i e transakshonnan aki ta keda sanshoná i kontrolá pa MOT?
16. Banko Sentral di Kòrsou i St. Maarten tin un bista riba e tráfiiko di plaka via di e sistema aki?
17. Ministernan por duna un indikashon dje "Money trail" prosedente di UTS?
18. Minister por duna un bista dje volúmen di benta via SMS/UTS?
19. Kua ta e reperkushonnan pa FWNK?
20. Un tersera por ópera den e sistema SMS di UTS?
21. Kua ta e ganashi ku UTS ta haña di e operashon aki?
22. Unda e ganashi aki ta aparesé den atministrashon di UTS?

23. Tur rifero por hasi uso di e sistema aki?
24. Kua ta e regla i proseduranan pa tráfico di plaka pafó di pais?
25. For di ki fecha UTS a kuminsá ku e transakshonnan aki?
26. Kuantu kupo di trabou lo bai pèrdí den e sektor di benta di number?
27. Si UTS tin konseshon ku ta permití benta di loteria?
28. Si pregunta nr. 27 ta negativo, Minister por informá nos bou di kua pèrmit/konseshon UTS ta partisipá aktivamente na wega di number?
29. Bou di kua pèrmit/konseshon Tele Curaçao ta ofresé/bende loteria?
30. Kon e ganashinan prosedente di loteria ta keda di buk den atministrashon di Tele Curaçao i Minister por duna nos un bista di esaki?
31. Gobièrnu tin e mekanismo pa kontrolá wega di plaka via SMS?

Konsiderando ku ta tumando diferente medida pa subi entrada di gobièrnu, ta imperativo pa sera tur nachi di evashon di impuesto, huida di kapital i ilegalidat en general.

Sperando un kontesta pronto, mi ta keda

Atentamente,


Helmin Wiels
Lider di Frakshon di Pueblo Soberano.